

## DÀMUCI UN SURRISU

Dàmuci un surrisu  
a cu' è sulu nta sta vita  
e havi lu cori 'n pena,  
a cu' soffri 'n silenziu  
cu l'ànima firita.

Dàmuci un surrisu  
a cu' manca lu caluri  
e lu cori ci batti scunsulatu:

Dàmuci un surrisu!  
L'anziani che viremu ogni jornu  
semu niatri a lu specchiu di dumani.

Avemu a èssiri chiù umani:  
semu tutti sutta lu stessu tettu!

## CELU

Vulissi èssiri n'aquila riali,  
vulari cu l'ali abbruciati  
di lu sulì  
a costu d'arrivari!

Avìri un postu nta lu to tiatru,  
parlari cu tia  
assittatu a lu to ciancu,  
ascutari lu to spaziu  
senza tempu  
e a li chiarizzi di lu matinu  
arruspighiàrimi  
cu na stidda pi cuscinu,  
vèstimi di li to occhi blu  
e vùriri  
li stessi cosi chi viri tu!

## QUANN'ERA PICCIOTTU

Quann'era picciottu  
saluti havìa,  
di la vicchiaia mi ni futtia!

Mi sintìa forti e sicuru,  
nuddu mi mittìa  
cu li spaddi a lu muru.

Ora passau la picciuttanza  
e la vicchiaia avanza!  
Havi assai sti robbi  
chi li cunnùciu;  
lu sapiti chi vi dicu:  
"Quarchi jornu  
fazzu na vampata,  
accussi l'abbrùciu!"

Ma c'è sempri  
un raggiu di sulì  
chi mi 'llumina la via  
e mi dà curaggiu.

C'è ancora amuri  
nta lu me cori  
e pozzu ancora vulari!

## LA MORTI

La morti nun dormi mai,  
di la nostra vita è la patruna!

Puru si t'ammucci  
nta li cafocchi, nta li vadduna  
e nta li chiù stritti cantuneri,  
idda veni  
e ti tira pi li peri!

È sempri 'n giru  
notti e jornu,  
nun s'arriposa mai:  
ma nun ci veni mai un malannu?

Sta fitenti  
firria sutta lu sulì, lu timpurali,  
li saitti e li timpesti di li venti:  
nun ci veni mai un accidenti?

Ma unni sta sta buttana vecchia?  
A desta, a manca, 'n celu, 'n terra,  
però quannu senti  
la campana a morti  
lu so cori canta!

La morti nun la poi 'ncatinari,  
è libira chiossai di niàtri;  
attraversa munti e mari,  
poi campari cent'anni  
o puru un jornu,  
ma lu momentu chi la canusci  
ti veni un corpu di sangu!

Ma sta racchia quanti anni po avìri?

È di quannu nascìu lu munnu


chi si ni senti parlari.

Sta strega, prima o poi,

futti a tutti!

Lu sapiti picchi è accussi?

Nun havi cori e nun canusci amuri!



## DINTRA DI TIA CRISCIA

Matri,  
jò dintra di tia criscìa!  
Attaccatu a lu biddicu  
mi davi lu to ciatu  
e lu me cori  
battìa cu chiddu to  
'n sintonia.  
Poi scivi di l'anìru,  
vitti la luci tutta 'n tunnu,  
lu celu blu,  
sintivi  
lu respiru di la terra,  
lu scusciu di lu munnu...  
e com'eri bedda tu!  
Matri,  
mentri lu suli splinnìa,  
jò affunciatu a la to minna  
ti taliavu nta l'occhi:  
cu la menti quantu cosi ti dicìa!  
Sintìa la to vuci:  
era musica pi mia!  
La to vucca cantava:  
"Figghiu beddu di lu cori!"  
Jò nta lu to pettu mi stricava,  
tu mi strincivi e mi davi  
vasuna a pizzicuneddu.  
Matri,  
jò t'aduru puru ora  
chi sugnu omu maturu...

## SIMENZA D'AMURI

Semu nta un vivaiu spittacolari!  
Sta terra è lu nostru paradisu,  
è un jardu nu di ciuri.

Niàtri nascemu già  
cu la simenza nta lu cori!  
È sangu chi scurri nta li vini!

Ci voli 'mpegnu,  
fatica jornu pi jornu.  
Ogni omu lassa li so' frutti  
e vivi nta la memoria  
di li novi ginirazioni.  
Accussì si fa la storia!



## NUN FARI CHIÙ FATICA

Vai, omu,  
t'accumpagna la bona sorti;  
ascuta  
lu richiamu di lu criatu  
chi ti grapi li porti.

Teni  
li rétimi stritti nta li manu,  
nun fari chiù fatica,  
canta l'innu di la vita!

Nun ti séntiri stancu,  
nun t'avviliri:  
hai ancora tempu pi rìriri e amari!

Ascuta  
li noti di lu to cori,  
scava nta l'agnuni di la memoria:  
hai ancora bona menti!  
'Mpàgina lu passatu,  
cunta la to stòria!

## NÙVULA CAPRICCIUSA

Nùvula capricciusa,  
t'ammucci nta lu celu  
e poi riappari.

Scinni la sira,  
la luna  
si 'ncontra cu la notti  
e sempri àuta stai.

È na sira di primavera,  
lu me cori si fa granni:  
na funti di caluri m'assulleva!

Ma jò nun sugnu aceddu,  
nun pozzu vulari  
e staiu cca, nta na varcuza,  
'n mezzu lu mari.

Lu me cori nun havi risettu,  
nta lu silenziu di la notti  
lu mari conza lu so lettu  
e sbatti nta li scogghi.

Haiu bisognu d'arripusari.  
Sunnù arruppati li me' pinseri  
e nun c'è nuddu chi mi li sciogghi!

## LA TO VITA

Quantu tàvuli hai cunzatu  
e trubberi assai hai scutulatu;  
muddichi grossi e nichì,  
amari e duci hai lassatu.

Avivi forza e saluti  
e lirizza nta lu cori;  
ti parìa chi lu munnu  
era tuttu chianu,  
ora ti pari stranu!

Nun ti passau mai pi la menti  
chi la vita è un giru di viti.

Ti sintivi 'mpurtanti,  
chissu è lu distinu!  
Ora la to vucca  
agghiutti 'n vacanti.

Omu vissutu,  
ascuti lu raloggju e tali fora:  
lu jardinu di lu munnu  
è tuttu ciurutu!

## LU CUMPLIANNU

Ringraziu a Diu  
picchè viù ancora la luci di lu jornu.

Assittatu davanti la porta  
sentu li picciriddi jucari e cantari:  
"Giro giro tondo,  
quando è bello il mondo!"

È la vita chi si rinnova!  
Quantu jorna passàru supra li me' spaddi,  
nun li pozzu mancu cuntari!  
Sentu ancora li bàttiti di la matri terra:  
quanta vita masticata di lu tempu!

Jò ritagghiu momenti passati  
e la menti mi sbucca di disù!  
Ora sugnu a la scinnuta,  
camìnu dintra di mia  
cu l'occhi chiusi:  
mi sbacantu la testa  
e arripezzu pinseri.

## L'ARVULU DI NATALI

*(L'anima resta addiuna!)*

L'àrvulu di Natali  
havi a raricari  
nta la nostra menti.

L'avemu a difènniri  
e allura sì  
chi virissimu li frutti  
di perli di saggizza,  
'nveci viremu  
vitrini 'lluminati,  
àrvuli finti  
senza ràrichi.

L'ànima resta addiuna!  
Dàmuni na manu,  
nun putemu arricògghiri  
si prima nun siminamu!

## LU GIOIELLU

Un jornu l'unniputenti  
cu tanta ducizza,  
cu manu ferma  
e un corpu d'occhju,  
stu granni gioiellu pusau!

Pi rigalu  
lu mari a lu coddu ci 'ntunnàiu  
e lu so ciatu ci spannù.

L'unniputenti fici stu prudigiu  
e lu suli ci puntau lu so raggiu.

Di tannu finu a ora  
c'è luci a qualsiasi ura.

Cola Pesci fu testimoni  
di stu granni avvenimentu.

L'unniputenti ci dissi:  
"Chista è terra di li sireni  
e di li fati!

Cea c'è bàrsamu di vita.  
Ti raccumannu, ténila additta,  
sutta c'è lu mari:  
chista è l'isula biniditta!

## JÒ OMU PRUFETA

Bona genti,  
chi ci faciti nta sta via?  
Qual è la ragioni di la vostra prisenza?  
Chiuttostu chi ci fa vossìa nta stu capannu?

Jò cca ci vivu e supravvivu.  
Sugnu cunsapevuli di sta vita,  
camìnu supra li petri  
e rispiru lu ciatu di lu ventu.

Rispettu la natura,  
sta terra mi nutrica:  
senti lu me passu  
e ci staiu appiccicatu a calamita.

Nun sugnu un riali  
e mancu un ciuri raru.  
La me vista  
si perdi nta sta biddizza  
senza misura.

Tra celu e mari viù luntanu,  
leggiu li stiddi  
'e tramannu mimoria.

Nta lu silenziu di la notti  
sciogghiu li me' pinseri,  
m'arrunchiu nta lu me vivaìu  
e cu l'occhi puntati a lu celu  
mi 'nginocchìu e mi cunfiru.

## LU MENDICANTI

Stasira, 'n chiazza,  
putì aperti, òmini 'n doppiu pettu,  
fimmini scullati cu manu vistuti,  
sguardi leti  
attraversanu vitra 'mpannati.

Jò respiru milli sapura,  
lu disù di svagu  
svàpura dintra di mia.

Nuddu mi canusci,  
nuddu mi saluta,  
eppuru sugnu 'n omu.  
Forsi pi sta genti  
sugnu malu vistutu.

Haiu 'n coddu  
un paru di càusi arripizzati,  
na cammisa di fanella e un pastranu,  
ma sutta sta peddi arrapacchiata  
haiu lu vistitu chiù anticu...

Tornu narreri:  
dumani lu sulì è di tutti.



## LU PRUGRESSU

L'omu persi la misura:  
è sempri 'nchiffaratu, voli strafari.  
L'omu fa straméri,  
sbanca muntagni,  
'mpasta pici e cimentu  
e 'nchiana lu surrisu di li ciuri.

Lu suli malatu  
sta canciannu di culuri  
e la surgenti nun leva chiù siti.

L'omu strafuttenti spanni vilenu,  
la terra supporta tradimenti,  
l'aceddi nun tròvanu chiù l'aniru  
e càrinu sicchi nta lu volu.

Li navi figghianu pitroliu  
e li pisci assummanu privi di vita.  
A occhiu nuru si vèrinu li danni!  
Accussì nun putemu campari:  
la natura marturiata nun rispunni!



## LU SPECCHIU DI LA VITA

Lu jornu è jornu picchè ci si' tu!  
Certu nun si senti chiù  
lu ciàuru di la giuvinizza:  
ora taliamu lu quadernu di li ricordi!

Nta li nostri facci,  
signati di lu tempu,  
c'è lu passatu cu lirizzi e stenti.

Avemu superatu  
li difficultà di la vita,  
a li voti s'avemu pizzicatu  
ma sempri cu rispettu.

Nenti c'è di canciatu:  
lu sintimentu è ancora vivu,  
c'è n'armònica nta lu me cori,  
scrivi pàgini di musica pi tia!

Si' la luci di lu jornu,  
la me ànima si specchia  
nta l'occhi toi!

Nun cercu novi orizzonti,  
vulissi chi tuttu arristassi accussì  
pi com'è!

Jò sugnu lu to stelu  
e tu lu ciuri  
chi 'nciaurisci ogni cosa!

## L'AVARU

Si' contentu di comu passasti la to vita?

Nta lu beni e lu mali,  
a destra e a manca,  
bonu ti firriau.

Pillicu,

facisti di tuttu pi sparagnari;  
ti liccavi la sarda a menzjornu  
pi poi manciaritilla la sira;  
abballavi senza musicanti  
sempri cu ddu vistitu strittu.

Oramai passau lu to tempu:  
un vastuni ti curreggi li peri,  
la vista ti misi a mancari,  
nun ti poi ammucciari!

Hai li dinari,

vulissi ancora tempu,  
oramai si' passatu di lévitu.  
Ma lu tempu nun lu poi accattari:  
pillicu, si' futtutu!